



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8



Rahul Dravid-i coach mapa atema pa tenung agütsüogo



Sudan: Abdalla Hamdok kidangi shilangogo, saka tanüker lir

VOL. XIX NO. 20 (ADOK 20) DIMAPUR YANGTEPNÜ (THURSDAY) MONGPUTENI (OCTOBER) 28, 2021 ₹ 5.00

Nagaland Governor-i NLA session jazüker

Dimapur, October 27, 2021 (TYO): Nagaland Governor-i 13 buba Nagaland Legislative Assembly indang session tugububa agütsü metetdaksüogo.

Assembly session ji November 15, 2021 anepdang 9:30 ako nung Assembly Hall, Kohima nung alitsü, ta Nagaland Governor-i sangdong ka nung ashi.

NDBA-i Nagaland nung customary courts lapoktsü mepir

Kohima, October 27, 2021 (TYO): Nagaland Dobashi Association (NDBA)-i state sorkar dang Nagaland nung customary courts lapoktsü mepishir.

metetdaksü. Nagaland Village Council of Acts 1978 ajanga village courts tenteta lir aser district ajak nung Dobashi temi anepaluba Customary Courts aser District Customary Courts lapoka lir saka item ya sorkar ajanga lapokba masü, ta NDBA-isa metetdaksü.

Bodbarnü NDMA-i Chief Minister Neiphu Rio den ajurutepdang iba temepishiba agütsü ta NDBA general secretary R Kemerio Yanthan, vice president Khrunyü Rino aser treasurer Lhaliezhu nungeri ashi.

Nagaland nung Customary Courts melapokra Arla 371(A) ajanga Nagaland nem Special Status agüja aliba tetsükdaksü ajurutsü aser sobaliba aser inyakyim samatsü akok, ta parnokisa ashi.

Dobashi reju ya Naga nunger sobaliba aser inyakyim nung tejentiba reju lir ta NDBA-isa ashi.

Chief Minister-i parnok dang Naga nunger sobaliba aser inyakyim kümzüka ayutsü nangzük ta NDBA-isa ashi.

Nagaland state ya Rules for Administration of Justice and Police in Nagaland 1937 aser Amendment Act 1984-Chapter IVA ajanga ketdang asür. March 4, 1987 nü India Tiria Nagaland Village Courts, Subordinate Customary Courts aser District Customary Courts lapoktsü molunga agizük, ta parnokisa

Customary courts official süa lapoka meliaka, küm shia application meyrjang junga arur aser customary laws ajanga ken o 300 tema angatetteper, ta parnokisa metetdaksü.

Chief Secretary-i AHoDs aser HoDs senden ayonger

Dimapur, Mongputeni/Oct. 27 (TYO): Nagaland Chief Secretary, J Alam, IAS ajanga Administrative Heads of Department aser Heads of Departments pur senden ka October 29, 2021 anügdang 11:00 ako nungi tenzüka Secretariat Conference Hall, Kohima nung amentsü jatepa lir.

senotsü indang, terenlok mapa, nübur tenzüka wadang nung mapa tajungtiba nung inyaksü asoshi yimya mesüra tangatetba tasen amshitsü densema tongtipang ken o jembitsü asoshi hopita shia senden amentsü atema.

Iba senden nung jembitsü onüktem yamai alitsü:

1. Taoba senden nung lemtetba onüktem lepa reprangshitsü.
2. Departmental inyakyim lepa reprangshitsü aser establishment inyakyim,

3. PRAGATI senden tem.
 4. Hornbill terenemshiba.
 5. ePaybills- Dept. of P&AR indang.
 6. Chairman nungi temelaba agir dang onüktem.
- Iba senden nung AHoDs aser HoDs ajunga arua adentsü metetdaksü.

Assam CM-i EC dang tatok meshi

Guwahati, October 27, 2021 (Agencies): Assam chief minister Himanta Biswa Sarma-i Election Commission dang Model Code of Conduct alema inyakba atema tatok meshiogo.

lapoktsü, apu, gari lenmang yanglutsü, high schools lapoktsü, stadium aser sports complex yanglutsü nangzük ta EC tsügdang ken o tem benoka liasü.

"Commission-i Assam CM Himanta Biswa Sarma dang tarutsü nung kümdangtsü aser Model Code of Conduct alema meinyaktsü metetdaksü" ta EC-i sangdong ka nung metetdakja liasü.

Sarma-isa süngolu nung mapa inyaktertemi tentetba self-help groups (SHGs) nem senotsü teyari agütsüsü nangzük ta EC-i ashi.

Sarma-i chief minister aser ano BJP Assam indang star campaigner ka ama election sentong aika nung mapa inyaksü nangzükba atema ken o ana tashi onok tsügdang benok, ta EC-i metetdaksü.

Assam Legislative Assembly nung Leader of Opposition, Debabrata Saikia aser Assam Congress president Bhupen Kumar Borah nati ken o benokba nung ajemdaker Election Commission-i Assam CM Himanta Biswa Sarma nem osang agütsü.

Bhawanipur, Thowrah aser Mariani assembly by-election atema nüboyimba sentongtem nung pai medical college

CM Sarma-i model code of conduct (MCC) alema inyaka lira tatok agüjang ta shidi züluba EC-i agizükogo.

Naga nungeri ola adokba angashia yimten latettsüla: CM Rio

Kohima, October 27, 2021 (TYO): Naga nungeri yimjung aginür aser Naga yimten latetdaksünür anungji nübortem ola angashitsüla ta Chief Minister Neiphu Rio-i metetdaksü.

ashiba atema asügdangdang "Ni parnok den jembidar aser parnoki tanü iba o meyipa agiogo" ta Chief Minister-i langzü.

"Naga nungeri adokba ola angaa telemtetba ka agütsüla. Iba jagi yimjung bener arutsü aser lanu putu atema teimla aser maongka bentsür arutsü" ta Rio-i ashi.

Nagaland nung United Democratic Alliance (UDA) sorkari Naga yimten latettsü atema tongti süa inyaker, ta Planning & Coordination, Land Revenue and Parliamentary Affairs Minister, Neiba Kronu-ia ashi.

Centre-i interlocutor tasen shimba A K Mishra dak temolung masür ta NSCN (IM)-i tawa

"Onoki maneni meranga inyaksü aser onok Delhi-i aotsü akok" ta paisa ashi.

Naga People's Front (NPF) MLA tem anioktsü atema Cabinet nung temelenshi asütsü asü ta asügdangdang "MLA aser political party ajaki sorkar nung party ajak adentsü atema meranger aser iba atema mapang agir, saka onoki ibaji inyaksü" ta CM Rio-i ashi.

NPF nem Cabinet menden agütsüsübaji Chief Minister dak keta lir ta jembiba atema Rio-isa "Chief Minister dak dang masü saka party ajak teyari aser amalitep dak keta lir" metetdaksü.

CS Alam-i engineer tem dang Nagaland renlok daksütsü ayongzük

Kohima, October 27, 2021 (TYO): Nagaland sorkari Vision 2030 Sustainable Development Goals renemba atongtsü atema engineer temi infrastructure renlokba nung temolung agüjang aser nübor taküm nung temelenshi bener arujang ta Nagaland Chief Secretary, J Alam-i tanü ayongzükogo.

onok terenlok aser tejakleni anir aotsü. Nagaland nung sorkar dak alaka engineer tem anioktsü atema economic sector tanga mali. Iba jagi sorkar indang engineer teimtiba lir" ta paisa metetdaksü.

Hotel Japfu nung FONSESA indang biennial general conference nung jembidar CS Alam-i "loktiliba nung tekolok tajungertemi inyakba mapa anaji engineering aser medicine disciplines lir" ta ashi.

State ka tejakleni aoba engine ji Engineer tem lir. Anungji engineer temi pei tajungtiba agi tenzüksüla, ta Alam-isa ashi.

"Nenoki khuret aika kokteta

"Nagaland state anguba nungi zügdangra mapa tajung aika inyaktetogo. Gari lenmang, electricity aser water system nung terenlok lir aser item ajak ya technical mapa ashirtem aliba ajanga lir" ta paisa metetdaksü.

"Khenkhen ketdangsürtem aser engineer temi MLA tem tashi angatsüsa akümer aser idangji inyakyim lateta aliba alema inyaksüsa akümer. Ajisüaka, asenoki ozüng meraksai item amala rongshiba nungi jenbua alitsü merangtsüla" ta Chief Secretary-isa ayongzük.

Iba sentong nung J Alam-i FONSESA indang unit ana indang Vision Document sayatsü. Unit anaji- Water Resources Department Engineers Association Nagaland aser Association of Engineers Department of Geology & Mining lir.

FONSESA-i terenlok bener arutsü atema bendanga agütsüshir

Kohima, October 27, 2021 (TYO): Engineering department temi terenlok mapa ajak nung tongti shilem agir anungji Federation of Nagaland State Engineering Service Association (FONSESA)-i state renloktsü aser tejakleni aotsü atema bendanga agütsüshitsü bangzüngtepogo.

renem. Parnokisa Nagaland Engineering Service Rules (NESR) 2012 yanglushitsü atema maneni inyaksü lemtet.

Bodbarnü FONSESA indang biannual conference alidang parnoki onük 7 aliba bangzüng

Küm shia March 4 nü World Engineering Day (WED) amongtsü FONSESA-isa telemtetba agiogo.

COVID-19 Nagaland: 12 dak putet & 15 taneptsü angu

FONSESA-isa constituent Associations dang tekaraba nung Vision Documents agütsüsü aser 2022 nung WED mapang itemji sayatsü

metetdaksü.

University tem ajanga dang degrees aser titles agütsür anungji Chief Secretary aser Administrative Heads dang entry level nungi dang Engineering Degree holders-i 'Er' title amshitsü atema shidi zülutsü ta FONSESA-isa telemtetba agi.

Parnokisa Engineer temi dang Engineering department Secretariat ketdangtsü takhangba agütsüsü lemtet.

Kohima, October 27, 2021 (TYO): Bodbarnü Nagaland nung nisung 12 dak COVID-19 putet aser parnok züngsema nisung ajak agi 31,759 kümogo.

Kohima o Longleng nung anana (2) aser Phek nung 1 lir" ta pai ashi.

"Tanü putetertemji Dimapur nung 8, Phek nung 2 aser Kohima o Mokokchung nung kaka lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nisung 31,759 rongnung 29,822 taneptsü nguogo aser ibaji 93.90% taneptsü anguba lir, ta Dr Kikon-isa metetdaksü.

"Kasa mapang Covid puteta alir nisung 15 taneptsü angu. Parnokji Dimapur nung 10,

Tang nisung 222 anepaludar saka parnok 173 dakbo shirangba yimya kecha mali.

"Mongulbar tashi nung nisung 708,115 nem COVID-19 vaccine indang dose 11,86,478 agütsüogo" ta State Immunization Officer, Dr Ritu

Thurr-ia metetdaksü. "Vaccine agirtemji frontline workers 60,957, healthcare workers 15,998, arishi küm 45 ser tempur 201,816 aser arishi küm 18 nungi 44 tsüngda alir 429,344 lir" ta paisa ashi.

"Vaccine agirtem rongnung nisung 478,363-i dose anaprong agiogo. Parnokji frontline workers 47,602, healthcare workers 13,368, arishi küm 45 ser tempur 158,554 aser arishi küm 18 nungi 44 tsüngda alir 258,539 lir" ta Dr Thurr-isa ashi.

Arunachal nung zero enrolment school 379 shibangogo

Itanagar, October 27, 2021 (Agencies): Arunachal Pradesh nung zero enrolment aliba school 379 tashi shibangogo aser school tem bangdak deputy commissioner ket nung agütsüogo.

Education Minister Taba Tedir-i metetdaksü.

Education department-i DC tem dang item school nung infrastructure amshitsü atema department nem mezüng maongka agütsüsü shiogo, ta

"School 379 indang infrastructure DC tem ket nung lir. Education department-i school tem mamshira tanga department nem agütsütü akok. Saka mezüng education department nem agütsüsü" ta Tedir-i ashi.

allotment aser LPC agizüktsüla. Iba ajanga school ali atsünga agiba azüoktsü. Onoki iba mapa atema sen lemezükja lir. Department-i DDSE ajak dang school tem timi map asütsü shiogo" ta paisa metetdaksü.

Education department-i school indang allotment aser LPC mapa meinyakba school ketdangsurtem merenshitsü, ta Minister Tedir-isa ashi.

NSSA-i mapa nungi anisüngzüker ketdangsür den tepila sentong agi



October 27, 2021 nü Secretariat Conference Hall, Kohima nung mapa nungi anisüngzüker tepila sentong agidang külemi tangokba noksa nung angur.

Dimapur, Mongputeni/Oct. 27 (TYO): Nagaland Secretariat Service Association (NSSA) ajanga mapa nungi anisüngzüker (retiring) officer ti (8) atema tepila sentong ka October 27, 2021 nü Secretariat Conference Hall, Kohima nung agia liasü.

Sentong nung sorkar mapa nungi anisüngzüker tenü nung Secretary, Social Welfare, Amenla Sashi-i jembiba mapang, küm 35 tejakdang tasen shimteter lanur 22 tashi LDA ama tang aliba Deputy Commissioner, Kohima indang office anasa Secretariat building tejenbai aru, ta ashi.

Kidang nungi pilar ki ka ama mapa inyakba tesem aser kibong tanabuba ama külemi inyakertem yutsütsü ya temolung rongjena bilemer, ta Amenlai ashi.

Lai batch nung lanurtem dang maneni bendanga agütsür, dangari akümtsübutüsü yimya tajung nung inyaktsü aser ano training agütsütsü ayongzüka liasü.

Asenoki angazüka sempet tajung amshira asenok ya Nagaland Civil Secretariat indang tongtoret asütsü, ta lai

ashi. Amenla Sashi-isa sentepa alirtem dang mapa inyakba tesem temonungratsüka kumdaktsütsü ajungmeso aser mapa inyakba mapang teyari aser lenmang bushiba nung nungnanga malitsü ashi.

NSSA ajanga tepila sentong ayongzüksüba atema mapa nungi anisüngzüker officer tem tenü nung lai pelaba shisem.

Iba sentong nung Additional Secretary, Mhathung Tungoe-i o tatsüka jembiba mapang mapa nungi anisüngzüker officer tem anema lia wadang tembangba atema tenüngsang agütsü aser milen amer ama lia aruba atema pelaba lemsatapa liasü.

Nenok service nung alidang pei atema mebilemi shilem tajung agiba ya teti atema tarak tajung ka asütsü, koba nenok melenzüker temi amshitsü aser tajungtiba nung nenoki inyaka yutsüba ama maparen balala inyaktsü, ta paisa ashi.

Secretariat Administration nung NSSA ya tongtoret ka amai lir, anungji 'junior colleagues' temi nendaka inyaktsüka aser pei dang

temaba menden nung alirtem dang lenmang sayutsü atema kanga junga metetjemer alitsüla, ta pai ashi.

NSSA tir Chubasangla Longkumer-i tarur pela agizükba o jembiba mapang, mapa nungi anisüngzüker aser state nung nüburtem ajungtsü asoshi parnoki mapa tajung inyakba atema akum agüja NSSA ajanga küm shia retirement programme tem ayongzüka alir, ta ashi.

Mapa nungi anisüngzüker ya Secretary Geology & Mining, Neiseu Tsikhanuo; Secretary Social Welfare, Amenla Sashi; Secretary Finance, Ayangla Longchari; Joint Secretary Finance, Imtinokchala Amer; Joint Secretary Home, H Chiten Sangtam; Joint Secretary Home, M Lisechem Sangtam; Joint Secretary Finance, KK Lihose Sangtam aser Under Secretary, Rongsenkala alitsü.

NSSA züngsemtemia o tatsütsü jembia aser Treasurer NSSA, Vibozoto Yiene-i melepzung o jembia liasü. Sentong nung 50th NSS batch ajanga temeja ken ka tena liasü.

DC & DEO Dimapur ajanga metetdaktsür

Dimapur, Mongputeni/Oct. 27 (TYO): Deputy Commissioner & District Election Officer Dimapur Rajesh Soundararajan, IAS

ajanga sangdong ka nung ashiba agi, Photo Electoral Rolls indang Special Summary Revision agitsü atema Election Commission

of India ajanga totuyuba agütsüogo aser tsünglanglen agüja aliba ama 01.01.2022 ya qualifying date alitsü:

Sl.No	Revision Activities	Date
1	Publication of Integrated draft roll	On 01.11.2021(Monday)
2	Period of filing claims and objections	01.11.2021 (Monday) to 30.11.2021 (Tuesday)
3	Special campaign dates	12.11.2021 (Friday) 13.11.2021(Saturday) 26.11.2021(Friday) 27.11.2021 (Saturday)
4	Disposal of claims and objections	By 20.12.2021 (Monday)
5	Final publication of electoral roll	By 05.01.2022 (Wednesday)
	No claims and objections will be entertained after 30.11.2021.	



Aor legislator par pungu (mena alir abelen nungi); Advisor Dr. Longrineken, Minister Metsübo Jamir, Minister Tongpang Ozüküm, Advisor Imnatiba aser Minister Temjen Imna Along den Ao Senden Literature Board (ASLB) züngsemtem (nuktaka alirtem) 26th Oct, 2021 nü Hotel Japfü Kohima nung telungjem senden ka amenba mapang tangokba noksa nung angur. Iba senden nung Ao kin kaketkeno aser oshioben tsütsü tang teinyakdak mapatem den tebilemstü ajurubatem aser tarutsü nung inyaka aotsü wadang balala lemsatapa liasü. Mokokchung, 27th October, 2021

District Welfare Officer Mokokchung ajanga metetdaktsür

Dimapur, Mongputeni/Oct. 27 (TYO): District Welfare Officer, Mokokchung, T. Aoakhum Longchar ajanga sangdong ka nung ashiba agi, 2020-2021 atema National Scheme (NSAP) aser Disability Pension kübok Old Age Pension, Widow Pension, Disability Pension, State Scheme kübok Scholarship to Handicap Students aser Blind Pension ya November 8, 2021 nungi tenzüka District Welfare Office, Mokokchung nung office lapokba mapang agütsütsü. Item pension agizüktsü mela alirtemi Arogo nung Pastor nungi Life Certificate den pension Payment Book bener arua item pension teyari ya agitettsü.

Ano maneni State aser National Scheme kübok Disability Pension aser Blind Pension agizükba temi pension agizükba mapang Disability Certificate indang photocopy, Aadhar Card (tenü zülüoka alinungbo) photocopy aser Passport Photo ka agütsütsüla.

Sen agütsütsü anogo telemasa yamai alitsü:

Tsurangkong - November 8 & 9, 2021; Japukong - November 10-12, 2021; Jangpetkong -November 15-17, 2021; Langpangkong - November 18, 20 & 22, 2021; Asetkong - November 23, 2021; Ongpangkong - November 24-26, 2021 aser Mokokchung Town - November 29 & 30, 2021.

Selection Test agiba atema NBSE ajanga metetdaktsür

Dimapur, Mongputeni/Oct. 27 (TYO): Nagaland Board of School Education (NBSE) kübok Register süa aliba kakat reju tekolaktem ajunga dang NBSE ajanga sangdong ka nung ashiba agi, HSLC & HSSLC Examination 2022 atema kakat reju kar nung selection test balaka agiba osang Board-i angazükogoo.

agitsüla. Special Needs aliba kakatshir nem kakat reju temolung agütsütsüla, ta ashi.

Maneni kakatshirtemi angazükba metettsü atema tsünglanglen agüja aliba mera amshitsü mepishiogoo:

Ajisüaka Management of Examinations, page no.13 B.i nungbo Government aser Private School temi kakatshirtem shimtetsü atema selection test balaka magitsü shia lir.

a. Class tests/assessment nung junga meinyaktetba kakatshirtem jangjateter remedial teaching agütsütsüla aser reassessment agitsüla.

b. Küm tepiyong nung tanurtem renlokba indang pei tsürabur nem metetdaktsütsüla, anungji dang parnoki yaritsü.

c. Kakatshir metok-meperi angatetsü atema kakatshir angazükba shilem aser renlokba reprangtsü kanga tongtipang.

Form fill up asübaji academic session tembanger ka ama mebilemstüla, ta NBSE sangdong ajanga ashi.

Anungji, selection test temeja agiba school tem dang Management of Examinations nung shia aliba ozüng sülen anidaktsü metetdaktsür, ta sangdong ajangasa ashi.

NPA, DPC aser KPC ajanga Asür Soreishim mang ayimer

Dimapur, Mongputeni/Oct. 27 (TYO): Photojournalist Soreishim Mahong asüba atema Nagaland Press Association (NPA) kanga sasar, shibai noksatem ajanga asangsang takzütettsüsa tangokteta liasü, ta NPA tir H. Chishi aser tongti zülur Dilip Sharma nati sangdong ka nung ashi.

inyaka liasü, ta DPC sangdong ka ajanga ashi.

Asür Mahong yagi pa mapa nung bendanga agütsür nendaka inyaka liasü aser pai shilem tajung aika agiogo, koba ajak molung nung teti alitsü.

Pa anojungi asüba ya asenok atema photojournalist tajung ka samaba kisüng masü saka ochishir aser Tsüngrem metetba takum ka samaba alitsü.

Pa asüba ya par kibong nung akoksaba kisüng masü saka osangbener atema takoksa tulu lir. Mangyimer kibong den DPC ajanga asükhu lemsateper aser asür tanüla tesunep nung anisüngzükjang ta sarasademtsür, ta DPC sangdong ajanga ashi.

Tang iba ama mangyim tejashi mapang Asür Mahong'er kinunger den NPA ajanga asükhu lemsateper.

Dimapur nung October 27, 2021 nü tembar tajung aser külem tenzüker, photojournalist Soreishim Mahong asüba osang angashia Kohima Press Club (KPC) aoksar aser sasar, ta KPT tir Alice Yhoshü aser tongti zülur Atono Tsükrü Kense nati sangdong ka ajanga ashi.

Mangyimer kibong nem tesuneptsüba agüjang aser asür tanüla nem teti tatem maka tesunep agüjang ta sarasademtsür, ta sangdong ajanga ashi.

Pa mapa ajanga otsü tajung aika nüburtem den lemsatepogo.

October 27, 2021 nü Dimapur nung DPC züngsem Soreishim Mahong asüba osang angazüka Dimapur Press Club (DPC) ajanga mangyim tejashi lemsateper, shiba Morung Express aser Eastern Mirror nung photojournalist ka ama

Tang iba ama mangyim-jashi mapang o agi nenok molung süngzüksütsü makok, saka Tsüngremi nenok nem tesunep agüjang ta sarasademtsür, ta Asür Sorei'er kinunger dang KPC sangdong ajanga ashi.



Mizoram chief secretary Lalnunmawia Chuaungo-i tan October ita voluntary pension agitsü lir saka pa Chief Information Commissioner (CIC) inyaksü shimogo ta General Administration department-i Mongulbarnü metetdaksü.

Myanmar tanur 1900 tema Mizoram school tem nung azünger

Aizawl, October 27, 2021 (Agencies): Myanmar nungi tanur 1900 tema Mizoram kübok school balala nung azünger. "State sorkari August ita nungi Myanmar nungi aruba tanurtem nem 'free education' agütsüstenenzük" ta Education department director, James Lalrinchhana-i ashi. Right of Children to Free and Compulsory Education (RTE) Act, 2009 nung

ajemdaker onoki meimchir asoshi aria bilemja iba mapa inyaker, ta pai ashi. "Myanmar toktsür aruba lennirtemi mepishiba onoki agizük. Ano parnok nem education magütsüra alimai onok aitsütsü akok" ta James Lalrinchhana-isa ashi. Myanmar nung tanur 1972 tashi school balala nung zünger. Parnok rongnung tebur 1010 aser tetsür 962 lir,

ta paisa shisem. Refugee tem aruba ajanga parnok indang osang hopta shia metetpelar, ta paisa ashi. Parnok teimba kati Mizo aser English angateter asünung parnok dang sayutsüba oshi balaka renema mali, ta James-isa metetdaksü. Mizoram-i Myanmar kübok Chin state den international border kilometer 510 agi arrtsüa lir.

Assam nung COVID-19 vaccine mezüng dose crore 2 agütsüogo

Guwahati, October 27, 2021 (Agencies): Assam nung Bodbarnü COVID-19 indang mezüngbuba dose crore 2 agütsüogo. Külen, Assam nung COVID-19 indang dose tanabuba lakh 76 tema agütsüogo. Tang tashi nung nisung 2,76,09,960-i vaccine agiba nungi parnok 20,0,03,623-i dose mezüngbuba aser 76,06,337-i dose tanabuba agiogo. Assam nung sites 2,601 nung vaccine agütsür aser iba

nungi sorkar site 2,588 aser nija 13 lir. Bodbarnü Chief Minister Himanta Biswa Sarma aser Health Minister Keshab Mahanta nati osang tajung metetdaksü. "Assam-i COVID19 vaccine crore ana agüja putiotsü tasen yangluogo. Health workers-i iba mapa tajung inyakba atema pelar. PM Narendra Modi-i iba Jan Andolan len aniba atema pelar" ta CM Sarma-i ashi. "Assam-i COVID19 vaccine dose mezüngbuba

crore 2 agütsüogo. PM Narendra Modi, Union Health Minister Mansukh Mandviya aser CM Himanta Biswa nung dang pelar" ta Minister Mahanta-ia metetdaksü. Assam nung taoba ghonda 24 tsünga nisung 347 dak COVID-19 putet aser parnok züngsema nisung ajak agi 6,09,262 kümogo. Kasa mapang Covid puteta alir nisung 3 asü aser parnok züngsema tasür ajak agi 5,981 kümogo. Assam nung tang nisung 2,644 anepaludar.

Assam nung BJP-i UP mesüka yimsü asür: Raijor Dal

Guwahati, October 27, 2021 (Agencies): Thowra constituency nung BJP-i parnok indang party office raksatsü ta Akhil Gogoi-i aniba Raijor Dal party-i tai tongloksüogo. "BJP aser TMPK züngsemetemi Paschim Panidihing Panchayat nung party chief office raksatsü" ta Raijor Dal-i ashi. BJP-i UP nung sorkar ketdangsübaren ama Assam nung tashiyim mapa inyaker, ta parnokisa ashi. "Tashiyim mapa inyakba aser Model Code of Conduct

alema inyakba aitsütsüla" ta Raijor Dal-isa metetdaksü. Mongulbarnü Raijor Dal party-isa BJP MLA Bhuvan Pegu pusemertemi Kokilamari nung party züngsemetem amak ta tai tongloksüo. BJP-i Thowra aser Mariani by-election nung takok angutsü atema sen aser tashi amshir, ta parnokisa metetdaksüogo. 'Raijor Dal' jengang tajungba akümba tsübuba agi BJP-i Thowra aser Mariani by-election nung sen aser tashi amshia takok angutsü meranger, ta parnoki ashi.

Guwahati nung apuani tepsetba atema 'caretaker' apu

Guwahati, October 27, 2021 (Agencies): Assam kübok Guwahati nung teintet rogo apuani na tepsetba atema caretaker Akash Choudhury puogo. Tena tepsetba tesem nung Akash Choudhury indang fingerprints angu. Police-i pa puogo aser pa kinungtsü danga asüngdangya südar. Bodbarnü Guwahati police commissioner Harmeet Singh-i iba osang metetdaksü. Akash Choudhury ya Bihar nungi lir aser Mongulbarnü police-i pa aser kinungtsü na apu. Tesüba küm 20 tashi Akash-i apuani na indang caretaker ama inyaka aru. Tena tepsettsü tasa atongba ya Akash liasü ta jangjaogo aser tanü pa chief judicial magistrate, Kamrup (Metro) tsüngdangi anir ao aser idangji pa anogo 7 nü police ket nung ayutsü temelaba agütsü. Akash dak alia Guwahati

Police-isa iba mapa nung shilem agir nisung ana puogo. Tenaji Buddhadeb (Babul) aser Jon Saikia na jangjaogo. Mongulbarnü police-isa Satyendra Singh aser Paresh Choudhury na pua lir. Akash indang mobile phone nung call list nung ajemdaker tena apu. Ajsüaaka, Akash dang asüngdangya asü nunga tang tashi pai menanzük lir. Hombor aonung Guwahati kübok Beltola tesem nung teintet rogo apuani na tepseta liasü. Tenaji arishi küm 86 tain Nani Gopal Barua aser pa kinungtsü 81 Meena Barua na ta jangjaogo. Tena indang jala ka London nung aser ka Mumbai nung alir. A i b e l e n e r t e m merenshitsüla. Tanü ozü tsürabur tepset, asüng tangar tepsettsü akok" ta jala kati osangbener dang ashi.

Tripura nung amakba aitsür: TIPRA chairman Pradyot Debbarma

Agartala, October 27, 2021 (Agencies): Tripura nung tawa nübo agi tangar memenepertem amakba ya maaksü mapang ka ta TIPRA Chairman Motha Pradyot Debbarma-i ashi. Bangladesh nung atalokba atema tayang küpzükba mangateter ta Pradyot Debbarma-isa ashi. "Ni nisungtem dang mebiledmangi mapa tamajung inyakba anentsü ayongzüker. Asenoki lisapur Tiplasa nung dang nungi angazüktsüla kechiyong parnoki Muslim nung dak mapa tamajung meinyak. Bangladesh nung Tiplasa nung dak tashiyim

mapa inyaker saka onoki külemi alitsü angazükogo" ta pai ashi. North Tripura district kübok Panisagar sub-division nung Vishwa Hindu Parishad-i rally ka agidang mosque ka raksatsü. Ano, Mongulbar nikongdang Vishwa Hindu Parishad (VHP) rally agidang dokan ana aser ki asem nung mi senoktsü. Bangladesh nung Hindu nung anema mapa inyakba anema VHP-i rally ayonga agi. Külen, Tripura police-i olulu prokshirtem dang kümdangtsü metetdaksüogo. Tripura nung social media sabangtem nung olulu prokshia tensa raksatsü merangertem merenshitsü, ta parnoki ashi.



Mizoram nung Assam Rifles sepaitemi Rs 33.46 lakh alang kozüjang aser poppy süngjang apuba sülen agiba noksa angur. Serchhip Battalion-i Mongulbarnü Tlangsam nung mita aodang Rs 22,46,400 alang kozüjang seret 5760 aser Rs 11,00,000 alang poppy süngjang apu.

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA**

No.DHFW-5/D.Pharm/Part-II/2014/9616 Dated, Kohima, the 27th Oct'2021

NOTIFICATION

With reference to the Letter No.DHFW-5/D.PHARM/Part-II/2014/ Dated Kohima the 11thoct 2021, the following Candidates are selected to undergo Diploma in Pharmacy (D.Pharm) course at RIPSAT Tripura for the Academic session 2021-2022. The following Candidates are provisionally selected through Academic Merit Marks.

Acceptance Letter may be submitted to the Deputy Director (Pharmacist DHFW) within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

Selected List

1. Lipoknarolmsong
2. MhalevinuoKulnu
3. Lepoksenlalmsong
4. LhouvituoKipu
5. RokkeFlorence.L(BT)

Waiting List

1. YansarhoniC.Ngullie
2. Easter L Sangtam
3. Ito Veswuh
4. MihiteApon
5. WochobeniT.Lotha

**SD/ DR. NEIKHRIELIE KHIMIAO
Principal Director
Dte. Of Health & Family Welfare
Nagaland: Kohima**

Issued by DIPR



TIR YIMYIM

YIMOBILEM (EDITORIAL)

DIMAPUR YANGTEPNÜ, MONGPUTENI (OCTOBER) 28, 2021

Jala jabaso taküm raksadak

Tetsübutüsü Covid-19 tashidak wara nungi nübortem kümzüksü atema asen lima nunga state government-i akhi ama nübortem kanga sademabo mesenzüdaksüi kanga meranga azüoka arudagi. Item tazüokbatem rongnung aonung 10:00 ako nungi anepdang 4:00 tashi curfew mapang latetja aliba ya ka asütsü. Tetezü, aonung 10 ako nungi anepdang 4:00 ako tashi kima yimdong nung nisung 4 dak tali külemi mesenzütsütettsü aser mesentetteptettsü. Atangji, nisunger yimya agia aonung 10 ako nungi anepdang 4:00 ako tashibo pei kidang anisüngzüka mejangba mapang lir, anungji lendongtsüdong ka atalok mesüra, idangjibo nisungtem ayongteper kima yimdong nung jajatsü nüngdak madoker. Anungji, kima yimdong nung nisung longsua mesenzüdaksütsü asoshibo curfew ya aonung masü anüngdang agütsütsüla ta aikati bilema alitsü aser aji shitak. Ajisüaka, government-i anüngdang masü aonungang, ajia 10 ako nungiang curfew agütsüba kuliji, aonung tesü nisungtem chiajemer mashimashi mekümdangi senzü tsübuba agi agütsü südi ta angatetter. Aji kodang jungjunga bilemdangdir, atangji, kanga rajema inyakogo ta bilemer. Ajisüaka, tesüngmangtsü aser tesusatsü kaji, Dimapur nungbo tesem aika nung aonung curfew mapangang aiür asangurtembo telongsuba sentepa chiajema pelatepa angur. Iba tensa tia ya tsüraburtem aikati memetettsü, kechiyong aonung ayaterem nungbo tsüraburtem kima yimdong nung mejajar. Ajisüaka, shitakba asen yimti tensa tia metetnüa, aonung ayaterem süir anepdang ka ana ako nung yimti longa repranga jajara aiür aser asangur chanutem chiajema tsüngsangdak kima gari sünga anendena yur longsutepa angutsü. Joko, anepdang ka ana ako atongdangbo aonung piyong chiajema kazüba agi letadoker, karbo yimdong nung apangteper senzüya angutsü. Itemji teimbaka küm 20 shi tain rogotem asütsü. Ashiko, item rongnungji asen jala jabasotema alitsüa akok. Parnokji yamaji anepdang ana asem tashi kazüa senzür arua anüngdang piyong mejangtsü aser ano aonung tesü ayazüka aotsü ta asenoki meteta aser memeteti kodanga shilanga marutettsüsa taküm teraksadaki odagi. Ashiko, itemji takar chirnurtem rongsen dak temulung lemer jajar alitsüa akok, mesüra sensaker chirnurtem senotsü tajangzük tera bushia jajar alitsüa akok. Aji oda, Nagaland nung yi ayoktsü memelar aser ano metenser tangbo curfew lir, saka temaba yimten menden nungi ozüng agütsüba dak alaka ozüngji mapa küma amshidaktsütsü purtem aluagi ali nung shinga senzüa mangur. Ibayongji, asen lima nungbo kecha ozüng mapa küma mebeshitetter. Atangji, aonunga sang, anüngdanga sang, pei chia jemnüba agi chia ajemer, anungji shingai kecha ashitsü mali ta bilemstüa akok. Ajisüaka, kechi mapa nung südir sang, kecha tazüokba mali pei inyaknütüsü inyaka jajadaksüba agi loktiliba nung nisung ajak menenadoktsü. Tanü Dimapur yimti kija nung aonung aiür asangurtem chiajema kazüdak tesem asem pezü tashi lapoka lir, idakji aonung shia lanurtem noklang junga sentepa chiajema kazütepba jagi asüng asen lima tebilemstü akümtsü. Atangji, item rongnungji asen chirnurtembo malitsüa akok, anungji tangar chir ka atema odang tokjang ta bilema alitsüa akok, saka item jagi asüng asen chirnurtem taküm dena raksatsütsüba jagi kecha meteta maka. Iba tangatetba nung tangar chirnurtem taküm raksabaji asen chirnurtem taküm raksar ama bilema, item jala jabasotem taküm raksadak tesem jagi moudaktsütsüla. Iba tebilemstü den atishia yangi tatishitsü ka dang lemsatepner: Africa lima nung HIV/AIDS agi tonger nisung aika lir saka asen lima masüji asenoki iba tashidak jagi asenbo matongtsü amai bilema parnok yaritsüabajibo yutsür, tangari Africa lima nung HIV/AIDS nokdangtsü inyakba mapatem dena aija asenibo bilemstüa akok. Ajisüaka, kenü anogo asen chirnur kar bendang lima sema senzüdang Africa tsür, Africa nunger kar ajurua medem dang tashidakji menatsüa akok. Iba tangatetba jagi tanü alima tesem koba nung südir süaka tamajung atalokba ajakji külem khuret kümer tamajungba küma maodang nokdangtsü meranger. Aji oda, asen lima nunga, tang tesem kar nung aiür-asangur taküm raksadak mesemteta aonung sangwaa longsutepbaji asen tebilemstü kümer menokdangra, asüngbo item tesemtemji asen chirnurtem kazüdak akümtsü aser item nung jagi tebilemstü aika pokteta alima sünga prokshitsü.

OLEMSABANG

YANGLUSHITSÜ APUSODI:

Naga Limai Nehimia ama Lenir Nüngdaker

~ Menjiwapong Jamir

(Yashi adok nungi...)

Naga Limai Nehimia ama Lenir Nüngdaker

Asen Ao kin/Naga lima teraksa tia nung lir. Ochimashi agi süngogo. Babilon lima alar den saku Naga nunger sen lar kümogo. Iba alar tia yabo asen sasa benlokba süngra lir. Sen dang ngurbo Naga nungeri mapa tamajung inyaksü metsübur. Naga nunger aika sen asoshi taküm alir kümdagi. Tsüngrem tsübuba, nübur meimba sempet aser jakla makaba leniri sünga kümogo. Tema nung alirtemi kolemer amer rakzükraakter, aser nüchiso bushirtemi prangpong amer rakzükraakter. Tilar, meshimejunger tali majung kümogo. Ya shibai yanglushitsü?

Yimti tiyong nung ochi laoa yur kecha masü, ajak shitak, ajak tajung ama litetba nüburtemji asaktsü! Ochimashi mapa nung kati ka terongku anakshitepa ali tashi nungbo asen lima telungisa alutsü. Mauyar saka "adjustment" dang aser "süpokrem" masü saka "sempet agütsütepba" yimya nem asenok meyokdaksüogo. Naga lima nung sen-tsüngrem tuluba kümogo. Ya shiba tai?

Nehimia putu nüburtem tasü maiti aliba ama Arogoi anir clean election nüngdak ta jembira, Arogoi yimden indang mejembitsüla, ya arogo mapa masü; Arogo mapaji tanela tekümtet asoshi dang ta Arogo tenzüker rongnunga karibo jembir. Nüburtemia ibala tebilemstütem indang Arogoi süoki yia jembira "Yimden aser Arogo balala ta asüba ya Baptist distinctive tongtibang ka lir" ta shia Arogo nungtemtsü meranger. Babilon aser temeküt kintem Israel nungeri tsübuba ama, Arogo nung lenirtemi anir takar, tulur, yimsüsür tsübuteper. Asenoki kechi sütettsüaka ta temulung moluteter. Arogo lenir shibai Nehimia ama tasü itta noktaktettsü? Laishiba nem masü saka nütsüng-nüburtem tebilemba (public opinion) nem dang Arogo/tenzüker anitaktsüra teimlaji tulukabo maka! Tanü tebilemdangtsü o kaji: Tzü aoleni angoo aor ta jembir süra "Arogo ya tzü asü angoo?" Arogoi Laishiba nung ajemdaker latettsüba nung nüburtem anitsü asü mesüra nüburtemi bilemba aser aginübalen Arogo anitaktsü? Mangdang kar aser ainkar ola abenba Tsüngrem tenzüker kanga nüngdaker. Sayutsüngir nungi ainkar jenjang dangi Tsüngrem tenzüker atutsü (promote) tensai akhanger.

Tsüngremi Arogoji jatet aser alima nungsa toktsü. Kechiba? Tsüngremi tenyaba mapa benzüka inyaksü aser alima merüktedaktsütsü asoshi Tsüngremi Arogo jatet. Arogo asoshi "mission field" ji alima lir. "Alima tesangwa" aser "alima metsü (salt)" akümtsü asoshi Tsüngremi Arogoji alima nungi jatet saka anosa alima nung toktsü. Iba tesayuba yagi Arogo mapaji rangben yanglushitsüba (holistic transformation) atema ta angateter. Alima yanglushitsü atema Arogoi "moral transformation" dak rangloker Lai tesayuba rakteta agütsütsüla kechiaser loktiji kijai akümba asünung kija taküm ajungtsüba jagi kanga tongtibang lir. Iba den ainkar ola adoka Arogoi ochimashi inyakyim (unjust system) anema apusotsüla. Tanela anepaluba den taküm rangben meshiteta alitsü tesayuba aser mapa Arogoi inyaksüla. Hau, tanela agi sünga tanela jenjang shitak lira takümü meshiteta litettsü akok. Saka rongsen ketzung nung, libaliru nung, yimden-yimsüsüba aser bangdak menden nung meshiteta mali tashi tanela jenjangjia shitak tabo meshitettsü. Nisung ka taküm ta kodang südir shi aser tanela ya lir. Anaji ka mejungi ka ajungtsü makok. Anungji nisung taküm ka dak indaka aliba ajakji Arogo teinyaksü lir ta metetdi. Alima nung temeshi, temerük aser ochi taküm melitet tashi kotak jenjang maka ta metetdi. Anungji kotaki aotsü sayudang tamasa alima nung koda nütsüng tajung ka küma litettsü ibaji sayutsüla. Alima yanglushitsüba jagi Arogo mapa rongnung tongtipang ka lir. Arogoi tenük amor, ibaji mangu, mangashi ama dang toktsüra Arogoji sentsütsür ka dang akümtsü. Kija jungaka "system" mejungra alimaji majungtsüsa asünung "system" merüktettsüjia Arogo mapa ka lir.

Saka Naga lima yanglushitsüji Arogo kija khuret asü? Masü. Naga lima yanglushitsü atema Nehimia ama ochishir yimden yimsüsür nüngdaker. Arogo tenzüker/laishir masüba nisung dang "secular" ta asenoki ajar saka shitakba nungbo "theological" aser "secular" ta bendangshidangba ya tim masü. Nisung shinga temeja "theological" mesüra temeja "secular" mali kechiaser nisung ajak dak "theological" aser "secular" anaprong shilem ya lir. Anungji yimden yimli aser Naga lima yanglushitsü mapaji arok tebilemstü lir. Aor sobaliba aser Laishiba anaprongi bangdak mendenji temeshi ta ashir. Aji asü nung Aor sobaliba nung ashi-auür, asangchi, lar-laponger yimden yimli nung mamshi. Tanü asen Naga nunger rongnung "auür" bo mali saka "adjustment" mongintem dang lir. Yimden yimsüsüba menden nungi ochi ajuzüka tsükdaktsüba ajanga asen lima raksa-ra raksaogo. Yimtsüng putu menden nungi shir tematiba bangdak menden tashi merüktettsü mapang lir. Yangku semer awazürtem masü saka chichiba Laishiba tesayuba dak ajemdaker yimsüsür Naga limai nüngdaker. Shibai Nehimia ama pei taküm tenla-a ochi nung noktaktettsü? Yimden yimsüsürtem shibai tenüng dak jaloka lokti aser alima yanglushiba nung "süsür" akümtsü? Tebang nung ninang mojitzü mezür jembiba lenir masü saka ochi pukümer aser ochi nung apusodi arung ta yimyim ayimoktsür, len piteta anir aoba lenir Naga limai akhanger.

Nehimia tendak ama Naga lima raksaba indangbo ajak jembir. Naga lima teraksa ajanga shinga kuaka meliteter. Yanglushitsüla tabo ajak jembir saka teinyakerbo kata mali. John F. Kennedy-i ashiba medem "Naga limai ni asoshi kechi inyaksütsü ta masü saka ni Naga lima asoshi kechi inyaksü?" ta tangatetba aketba lenirji tang rongdak nüngdak lir. Asen taküm aser libaliru ajanga alima memenentsüra teyanglushir menüngdaksü. Anungji nai/ni Naga lima asoshi inyaksü mezüngbubaji kin/alima raksaba nung shilem magitsüla. Alima memenenra merüktettsü menüngdak; tebenjatsür melira tebeteter menüngdaksü. Iba dak sendakba nung tang Nagaland nung NPSC tatidang agiba mapang lir. Naga lima jungdi süra "selection process" ji temeshi aser ochi asütsüla. Ochimashi mapa ajanga aser "backdoor appointment" ajanga adokba lenir/yimsüsür jagi alima memeshitsütettsü. "Corrupt system" ya tera nungi atsüteta meindoki kongsangsa petshiba jagibo dragon kolak ama labi (shoot) aika mokoteta atoka alimaji mokseptüsü.

Nehimia mapang ama tanü asen Naga lima tepetzük tia nung. India lima nung Nagalandji "the worst performing state" ta jungkai adoktsüogo. Nagaland dang "the most Baptist state in the world" ta ajar saka tanü iba state-ji kechi jenjang nung lir? Ya arok-aroka shisadangdi. Ya shiba tai yong? Ya shibai yanglushitsü? Tangar dak meyimlali arung. Asen lima asoshi Nehimiaji na aser ni kümdi. "Arung apusodi" ta ayongba tasü tait aser ochi nung ametba lenir kaka kümdi arung!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

BSI Dimapur-i Itanagar nung BSI branch ka semzüksüogo



Dimapur, Mongputeni/October 27 (TYO): October 26, 2021 nü Bible Society of India, Dimapur Auxiliary-i Christian Revival Church, ESS Sector, Itanagar nung BSI Itanagar Branch semzüksüogo, ta osang ka ajanga metetdaksü.

BSI branch semzüksüba den anogo ka seminar repsema agiba sentong nungji Arogo 28 nungi lenir 70 shi aden.

BSI Dimapur Auxiliary Tir, Rev. Dr. N. Paphino-i ketdangsüa BSI Itanagar Branch semzüksüba sentong agi. Pai tenüngsang agütsüba den külemi tamangertem atema sarasademtsü aser BSI branch semzüksüba temaitsü temo milen ka tsükloka liasü.

"BSI ministry nung ajemoka shilem agiba ya temoatsü ka lir. BSI ministry nungbo denomination telemsa kecha mali. BSI-i Tsüngrem aser Pa O atema dang inyaker. Ministry indang tongti nükjidongji Tsüngrem O mangashidangpurtem nem Tsüngrem O angashidaksütsü atema lir. Amangbapurtem nem iba ministry nungita yaridaksüner," ta pai mepishia metetdaksü.

Kasa sentong nung Auxiliary Secretary, Rev. Dr. Yiepetso Wezah-i BSI ministry inyakim indang metetdaksüadang pai, "Bible Society maparen ya tetsür chanu ka tenüng agi Mary Jones ajanga tenzüka liasü, kechiyong lai lar oshi nung Laishiba bushia liasü, ibayongji tamangertem nem jenjang dalang agi Laishiba agütsütsü nükjidong nung 1804 küm

March 7 nü British & Foreign Bible Society tenzüka liasü," ta metetdaksü.

1946 küm May 6 nü linük 13 nungi lenirtem Elfinward Conference Centre, England nung adenshia liasü. Iba senden nung adener aikati World War II nung ajangshiba lemsatep; World War II mapang Poland nung Laishiba mimshia alemba aser tepuokdak alirtem nem Laishiba lema agütsüba parnoki lemsatepa liasü.

Iba senden nung adenertemisa, timtem toudhi mapang nung Tsüngrem O ajanga teimla aser tesünap anguba lemsatepa liasü, iba denji külemi pei oshi nung Laishiba züngtetsü aser alima nung nisung ajaki Laishiba züngtetsüsa Laishiba meyiptsü kanga nüngdak, ta lemsatepa liasü.

Ajioda parnoki longjemer United Bible Societies tentetsü lemtet. United Bible Societies indang tongti mission ji Tsüngremer tenyaba mapa tulutiba- linük, kin aser oshi balala jembir ajaki Tsüngrem O angashidaksütsü atema liasü.

Bible Society of India ya mission society ka lir aser parnok indang tongti nükjidongji nisung ajak nem jenjang dalang agi Laishiba agütsütsü atema lir.

December ita mezüngbuba Amongnü Bible Sunday amongtsü lemtetba atema Bible Society-i Arogotem dang pelar. Iba anogo nungji Arogotemi Bible Society of India ministry atema sarasademtsütsü aser ministry nem tenla agütsütsü.

Yisu Khristar tenyaba wadang tulutiba ataloktsü

atema Arogotem aser Bible Society of India na longjemer inyaksüji kanga tongtibang; Arogotem teyari ajanga Bible Society of India-i kin ajaki Tsüngrem O metettsü aser Yisu nütsüng kaka kümdaksütsü atema inyaktetsü, ta paisa ashi.

Marketing Assistant BSI, Ganhand Aran-i BSI branch teinyaksü shilem indang lemsatepba den külemi amangbapurtem dang BSI den amalitepa yaritsü ajungshia liasü.

BSI branch semzükba den seminar sentongji Takh Likha, Secretary, BSI Naharlagun Branch leniba nung agi, Rev. Dr. Jarom Doi-i sentong tenzüka sarasadem aser Arunachal Pradesh Christian Revival Church Council nung Tir, Rev. Tai Ete-i sentong nung adenertem pelaa agizükba o jembia liasü.

Member Auxiliary Committee, Rev. Tar Choya-i tang tasen shimba office ketdangpurtem agizüka liasü; office ketdangpurtemji - Tir Binmi Eshi, tatong Tir J. T. Boi, Secretary Nabam John aser Treasurer Tmchi Kame nung lir.

Sentong tembanga Christian Revival Church, ESS Sector nung pastor-i sarasadem.

BSI Branch semzükba sentong aser seminar Christian Revival Church, ESS Sector Itanagar nung ayongzüka agiba atema BSI-i par Arogo dang pelaba lemsatepba den külemi tenla tajung agütsüba atema APCRCC dang pelaba lemsatep.

Taraba state nung Fulani teloki pastor, Dr. Solomon khaset

October 27, 2021: Tan ita tomlen Fulani teloki Nigeria nung Taraba state kübok Jauro Yinu yimdak Charity & Hope Ministry Tir, Dr. Habila Solomon par kidang lia khasetogo, ta International Christian Concern (ICC)-i metetdaksü.

"October 1 nü Fulani telok par ki amak, saka idangjibo pa kümzüka liasü. Ajisüaka October 14 nü kasa telok arua

pa teku nung injang khaloktsü, aser iba tesem nungjisa pa asü," ta pastor, Nwamandze Gaiusthe-i metetdaksü.

Solomon ya doctor dang masü saka pastor-a inyaka liasü. Pai Fulani Muslim nung den-a Khrista osangtajung lemsatepa liasü.

"Fulani nung kari Khrista agizük asütsüa akok, ibayongji Islam yimsüa alia amanger

Fulani teloki pa tepsettsü atema telemtetba agia asütsüa akok," ta Gaius-i ashi.

"Dr. Solomon ya missionary ka liasü, aser pa ajanga nisung meyrjang aika Khrista dangi meyipogo. Sensakertem nem tzü, chiyungtsü, tejenokdak aser angati shisaliok agütsütsü atema Tsüngremi pa taküm amshia liasü," ta paisa metetdaksü.

ANO GO ABEN TSÜNGREM DEN

"Masü, Kibuba" temelen masü

Idangyongji parnoki parnok rong aser parnok tebu toktsü aser Pa sülen anidak. Mathi 4:22

Kodang Yisui Pa mapa tenzü, Pa kijai "temulung meyiptsü aser kümzüksü" osangtajungji alima ajunga dangi bener moutetsü ta Pai meteta liasü. Iba melen, Pai sayutetsüba nütsüng 12 shimtet aser parnoki tangar dang sayutetsüba pur dang sayutsü. (2 Timothy 2:2). Yisui Pa den atentsü ajaba rongnung Yakob aser Yohan mezüngbuba aja. Kodang Yisui parnok den jembia parnoki ibai tebilemba tajung ta mashi, mesüra marutetsü taka mashi, saka idangyongjisa anidak. Küm aika tejakdang Abraham dang Tsüngremi jembia, parnoki ashi, "Hai, Kibuba." Parnoki tesülen ajak doktsü - parnok tebu, parnok rong, aser parnok tesüba taküm kechiaser Yisui parnok aja.

Tanüa Yisui na aser ni ajar. Asenok taküm azüoker Pa sülen anidaktsü Pai ajar. Peisasa azüoker anogoshia pei kangki aputsü Pai ajar (Luke 9:23). Ajak dak alia Pa tali meimtsü asoshi Pai asenok ajar. Tebu, tetsü, chirnur, adianu, kinüngtsü dang tali Ni meimra pa/la Kü nütsüng asütsü metemsü (Luke 14:26-27). Asenoki ajak toktsür asü, mesüra kar dang asen taküm den sütepba yanglur tetsüng külenbo alima nungsa ajemmoker Pa sülen anidaker? Kodang Pai Pa anidaktsü ozüng agütsür "Kibubaji" temelen ka masür. Idakji telangzüksü ana dang lir: "Lemang mali" mesüra "Hai, Kibuba". Kodang Pai asenok jadiri asenok Yakob aser Yohani anidakba ama anidaktsüla. Idangyongji parnoki parnok akaba ajak toktsür Pai ajaba nangzük. Tatemzükba kuli teyanglu. Pai kechi atema asenok aja iba atema Pai asenok renemtsütsü ta metettang.

Oba, ni tanü Ne ola angashitsü kü temetetba shisatsü nung kongshiang aser ni tashi anga nangzükdakjang. Amen.

"Yanglushidi Arung" YSS Vol. 3 kaketsayaogo



Pastor Rev. Ponen Longchar-i 26th October nü MTBA office nung "Yanglushidi Arung" YSS Vol. 3 kaketsayaogo tangokba noksa nung angur. Mokochung, October 27, 2021.

Mokokchung, Mongputeni/October 27 (TYO): "Yanglushidi Arung" YSS Vol. 3 kaketsayaogo October 26, 2021 nü Mokochung Town Baptist Arogo (MTBA) nung Pastor, Rev. Ponen Longchar-i sarasadema sayatsüogo.

Iba kaketsayaogo nung Rev. Dr. Wati Longchar general editor lir aser ibai pa lenisüba nung adok, ta osang ka ajanga metetdaksü. Kaketsayaogo keta alibatem ya "Yanglushidi Sensaksem Sabang" nung lemsatepba onüktem nungi lir. YSS sabang nung tanü tendak nungdakba onük aika lemsateper.

Tan adok Vol. 3 nung item onük ya keta angutsü; lokti yanglushiba nung lanur shilem, Covid sülen Arogo teinyaksü, tanü mobile addiction lokti nung tebilemstü, ano aika. Onük

tajung aika keta aliba kaketsayaogo lir, ya azüngba ajanga lenmang aisü nung yanglushitsü asoshi shisatsü aika angutsü imlar.

Iba kaketsayaogo item ket nungi sen 250/- agi talitsü angutsü; Dimapur area (Wati Aier Principal DBC - 9612830935), Kohima area (Tiatoshi Longkumer A/P KABA - 9856587377), Tuli area (Mapula Lemtur A/P Women, Tuli Town B/A - 9612313753), Mokochung area (T. Arenla Ao, Women Coordinator ABAM - 7005527600 & Temsüwati Kichu A/P, MTBA - 7005761441).

Pastor Rev. Ponen Longchar-i 26th October nü MTBA office nung "Yanglushidi Arung" YSS Vol. 3 kaketsayaogo tangokba noksa nung angur.

OLONG PAITEP # 5979

	1			2	3				
4			5						6
					7				
	8								
	9			10				11	
						12			13
14									
						15			
			16						

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

OLONG PAITEP # 5978 TELANGZÜBA

TIPILEN :		LANGTSÜNGLEN :	
1. Lemsä, 3. Osang, 5. Mezüng,		1. Lamem, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			

MEMETETBA MOBILE NUMBER (UNKNOWN NO.) KA NUNGI AIÜR OLA TANÜK KATI ALOKBA DEN JEMIBIR :

Unknown no : Hello, ya na Alokba südi?
Alokba : Yes, koda?
Unknown no. : Oko na ya kibong kümer maküm?
Alokba : Ni ano asangur ka dang lir, na shiba aser na a kibong kümer maküm?
Unknown no. : Saala Alok, kidangi tang shilanger ak jepa sorochiokang, ni mahela pur meetingi odi.
Alokba : Ooch-- Warakla ati!

~ Lilir : WhatsApp

TANÜBO NAI LANGZÜANG

Q. Koba yipru ajanga Poland, Germany, France aser Netherlands linüktem nung kanga mejungi konghisa liasü ?
 [A] Alisa [B] Aurore [C] Afro [D] Bizarre

===== (Taruba adok nung onoki langzüsü)

YASHI ADOK TELANGZÜBA: Rome

AO OSHI ANGAZÜKDAK:
TANÜ ANGAZÜKTSÜBA OJANG

Lemtep
 (v) o lemsatepa jembi (discussion)
 * Taküm lokti senden nung ken o kanga junga **lemtep**.

Lemtet
 (v) renema jembi, mulungtet (resolve)
 * Yimkongi pei kima yimdong merüka ayutsü **lemtet**.

Happy Birthday

TENÜNG : N. ZOE JAMIR
 Tasoba Anogo : 28 October
 Küm : 6
 Talidak : Kumlung Ward Mokokchung
 Temeim jabaso N.Zoe Jamir, na tanü küm terok ajungba anogo moatsüba asoshi Tsüngrem tenüng asanger aser tepela tasoba anogo salem ne den lemsateper. Ali nung na taso shia aser temoatsüba taküm ka südakjangma ta Teyanglur Tsüngrem dang na asoshi onoki sarasademtsür.
 ~ Temeim Oja, Oba, Periba, Otsü, Obou & Kinungertemt

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

SUDOKU # 6020							TELANGZUBA # 6019								
	2	4				7	6	7	9	3	1	4	8	2	5
7	6					8	2						4	8	5
8	9		7	4									3	1	2
5	8				6								1	9	8
			5	9		6	4						5	4	3
9			2	7	8	1	5						2	6	7
4		9				7	6	5					7	2	4
3			1	6	7		9	2					8	5	6
6	7	2			4		8						9	3	1

OJANG LUTEP # 5565

KÜTAM :
 KSTERAA :
 ERBEN :
 TSREÜNGM :
 SHBUIA :
 URTAREM :
 MNE :
 OTKAK :
 HIBKICA :
 KTSLAPOÜR :
OJANG LUTEP TELANGZÜBA # 5564
 TAJANGZÜK ATEMA TEMBAR AYIMER JAGI NE MAPA
 SHITAKBA NUNGBO MEYARITSÜ

TAN HOPTA ATEMA - KOMA SÜLA ?

Q. Naga nunger yimten tebilemtsü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

Olong 20 shi nung October 29, 2021 tashi nung iba telangzüba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.



New Delhi, October 27, 2021: Bodhbarnü New Delhi nung Ato kilonser, Narendra Modi-i Dadasaheb Phalke award angusang, actor Rajinikanth aser pa kinüngtsü, Latha Rajinikanth na ajurudang tangokba noksa nung angur.

Pegasus ken o bushitsü atema SC-i committee ka tentetogo

New Delhi, Mongputeni/October 27 (Agencies): India nung yimtenren lenirtem, opposition lenirtem, osangbenertem aser tongtibang sensotem itangittsü atema Centre sorkar agency temi Israel nunger Pegasus spyware amshio, ta tai tonglokja aliba ken o bushisüngdangtsü atema Bodhbarnü Supreme Court (SC)-i züngsem asemi akümba mongin committee ka tentetogo. Taoba mapang Supreme Court judge ka leniba nung committee-i iba ken o bushisüngdangtsü.

"Pegasus mangatetep ken o ochi jungkai adoktsü atema iba committee tenteter," ta SC-i metetdaksü.

Iba committee nung tekolakji taoba mapang SC judge, RV Raveendran asütsü aser tanüngba züngsem anaji Alok Joshi aser Sandeep Oberoi na lir.

SC-isa, tamalen iba ken o benokba temepishibatem agi court melung mesüi liasü, kechiyong itemji osangkakettem nung adokba osangtem nung ajemdaker agütsü, ajisiüaka takoksa angurtemia temepishiba ken otem benokogo, ta metetdaksü.

Pegasus ken o dak sendakba nung Centre sorkari onok melung asütsüsa telangzüba magütsü, ibayongji court-i mongin committee ka tentettsüsa aküm, ta SC-isa metetdaksü.

Court-i Centre dang iba ken o nung amalitepa inyaksü asüngdanga liasü saka Centre-i affidavit nung melungsüa

telangzüba magütsü, ta Court-i ashi.

"Linük security nung ajemdaker sorkar paidoktsü makok aser sensotem temeden anema inyakba ken o lia court-i ola madoki yutsütsü makok," ta SC-i metetdaksü.

Supreme Court-i committee dang iba ken o ya jungjunga bushisüngdanga sülen court nem report agüjang ta tuyu aser maneni hopta 8 sülen kasa ken o angadangtsü lemtetogo.

NSO indang Pegasus spyware amshia osangbenertem, meimchir temeden atema inyaktertem aser lenirtem anema amshio; nija ka osang itdangittsü atema smartphones 'hack' süogo, ta tamalen Washington Post den media partners 16-i sangdonga liasü.

NSO Group-ibo, kiralongrartem aser ozüng alema inyaktertem itdangittsü atema parnoki Pegasus ya sorkartem dang ang ayoker, ta metetdaksüogo.

Tamalen Supreme Court bench-i, sensotem itdangittsü atema Centre sorkari Pegasus amshio ta tai tonglokja aliba ken o bushisüngdangtsü atema parnoki mongin committee ka tentettsü bilemdar, ta metetdakja liasü.

Iba ken o angadanga mapang nung Centre-i SC dang, linük security dak sendakba nung sorkari yimjak nung osang tejangja agütsütsü makok, ta ashiba den külemi, iba ken o bushisüngdangtsü atema sorkari mongin committee ka tentettsü melunga lir, ta metetdakja liasü.

Pegasus ken o ya court-i ketdangtsüa bushisüngdangtsü atema court nem temepishiba ken o aika agüja lir. Parnok rongnung journalists N Ram aser Sashi Kumar na, Rajya Sabha MP, John Brittas, advocate ML Sharma, taoba mapang Union Minister Yashwant Sinha aser RSS lenir, KN Govindacharya nunger densema lir.

Parnoki SC nung tang teinyakdak judge ka mesüra mapa nungi anisüngzüker aliba judge ka leniba nung iba ken o bushisüngdangtsü court dang mepishi.

Pegasus amshia sensotem anema itdangitba ya senso ka temeden anema inyakba lir, aser linük temzüng nung Arrla 14, 19 aser 21 kübok aibelen lir, ta temepishiba ken otem nung shia lir.

Taküm July ita tomlen International media ajanga, sorkar agencies dang ang ayokba Israel nunger spyware ka amshia India nung nisung 300 dak tema phone ajanga itangiter asütsüsa akok; mobile phone number 300 dak tema jangjaogo aser item rongnung tang teinyakdak minister ana, osangbener 40 dak tema, opposition lenir asem, Supreme Court judge ka, shishilembartem aser India nung activist tem aika indang phone number densema lir, ta metetdakja liasü. Nisung 300 dak tema nungji Congress lenir Rahul Gandhi, election asalentong yanglur mongin, Prashant Kishor aser Union IT Minister Ashwini Vaishnav nunger densema lir.

Amarinder Singh-i party tasen ka tentetogo

Chandigarh, October 27 (Agencies): Sangküm küm tetenzüklen Punjab nung assembly election agitsü lia Bodhbarnü taoba mapang Punjab Chief Minister, Amarinder Singh-i party tasen ka tentetba sangdongogo saka party nungjajibo Election Commission ajuruba sülen ang sangdongtsü, ta metetdaksü.

Par party-i BJP den lokteptsüa akok, ta paisa metetdaksü.

Bodhbarnü Chandigarh nung osangbenertem den jembidang Amarinder Singh-i, Brihostibarnü pai Union Home Minister, Amit Shah ajurua Punjab state dak sendakba tebilemtsü onük balala lemsateptsü, ta ashi. Tawa pai Amit Shah anaben ajurua liasü aser tang agi tasembenbuba ajurutsü.

Taruba election nung Amarinder-i Navjot Singh Sidhu (Punjab Congress Tir) anema candidates toktepdaktsütsü; Navjot Singh Sidhu-i toktepd


menden ajak nung pai candidates toktepdaktsütsü, ta pai ashi.

Taoba mapang anaben tashi Chief Minister inyaksang, Amarinder-i, state security atema India-Pakistan arrtsülen kilometer 50 tashi nung BSF sepai lemsütsütsüla, ta ashi.

Congress party tang tashi metoktsüba dak sendakba nung tasüngdanga ka langzüdang pai, "Tesüba küm 52 tashi ni Congress nung liasü. Anungji taruba anogo 10 tashi nung ni sodi memeshiba agibo kecha masütsü," ta ashi.

Congress lenirtemi pa aitsüba dak sendakba nung pai, "Parnoki ni aitsüba dang masü saka tangbo Patiala densema tesem balala nung ni pusemertema amokmerendar," ta metetdaksü.

Amarinder-i, "Sangküm election nung ozü party-i BJP den lokteper tokteptsü imlar. Mapang tatong nung onoki menden 117 prongla nung tokteptsü," ta metetdaksü.



October 27, 2021 nü New Delhi nung Yamuna ayong nung tantsür ka arakseta asütsüsa aliba mapang rong anir kati la kümzüksü aoba noksa nung angur.

By election nung tokteptsüpur 44 anemabo ken o benoka lir: ADR

New Delhi, October 27 (Agencies): Taküm assembly by election nung tokteptsüpur candidate 235 nungi candidate 44-ibo parnok anema ken o benoka aliba sangdongogo, ta Bodhbarnü Association for Democratic Reforms (ADR)-i metetdaksü.

National Election Watch aser ADR nati candidate 265 nungjagi candidate 261 indang affidavit asadanga liasü. Candidate temji state 14 kübok Lok Sabha constituency asem aser assembly constituency 30 nungi lir. October 30 nü item menden atema by election agitsü.

Assembly by elections nung tokteptsüpur candidate 235 indang affidavit asadanga, aser parnok rongnung candidate 44 (candidate shilem 19)-ibo parnok anema ken o benoka aliba affidavit ajanga sangdongogo.

"Parnok 44 nungjagi 36 (shilem 15) anemabo ozüng alema inyakba ken o tulu benoka lir," ta Association for Democratic Reforms report nung shia lir.

Candidate 77 bo crorepati lir aser parnok ket nung aliba

rongsenji kasa lemtsüra candidate shia sen crore 2.99 jenjang rongsen lir.

"Candidate 235 nungjagi candidate 18 bo tetsürtem lir," ta ADR-i metetdaksü.

Madhya Pradesh, Dadra & Nagar Haveli aser Himachal Pradesh nung Lok Sabha by election nung tokteptsüpur candidate 26 indang affidavits asadanga, aser parnok rongnung candidate pezüi parnok anema ken o benoka aliba sangdong; par pezü rongnung ka anemabo ken o tulu benoka lir, ta ADR-i metetdaksü.

Lok Sabha by election nung tokteper candidate tenet crorepatis lir aser parnok ket nung aliba rongsenji kasasa lemtsüra candidate shia sen crore 4.97 jenjang rongsen lir.

"Candidate 26 nungjagi pezübo tetsürtem lir," ta ADR-i ashi.

October 30 nü assembly by election agitsü aliba state temji Assam, West Bengal, Madhya Pradesh, Himachal Pradesh, Meghalaya, Bihar, Karnataka, Rajasthan, Andhra Pradesh, Haryana, Maharashtra, Mizoram, Nagaland aser Telangana state tem lir.



October 27, 2021 nü New Delhi nung aliba BJP Headquarters nung BJP National Secretary, Sunil Deodhar aser MP, GVL Narasimha Rao nati osangbenertem den jembidang tangokba noksa nung angur.

HNB-i Tuensang & Kiphire nem medical teyari agütsü



Help Nagaland Breathe Campaign-i medical relief aser supplies agütsüba Deputy Commissioner Kiphire, T Wati Aier-i agizükba noksa nung angur.

Dimapur, Mongputeni/ October 27 (TYO): The Help Nagaland Breath (HNB) Campaign-i Tuensang district nem medical aid/ equipment tenla agütsüba atema District Task Force, Tuensang tenüng nung Deputy Commissioner, Tuensang, Kumar Ramnikant, IAS-i parnok dang kanga pelaba lemsatepogo.

Osetem mezüngbuba shilem August 24 nü district tonga aru aser tanabuba shilem October 24 tonga aruogo. Osetem rongnung oxygen cylinders, oxygen cylinder regulators, thermometers, oxygen masks, paediatric oximeters, PPE kits,

pulse oximeters, IR temperature gus, ply masks, sterile & non-sterile gloves, steamers, N95 masks, hand sanitizers amala medical aid aser hadir tem aika densema lir.

Deputy Commissioner-isa, medical aid/equipment tem ajanga district nung COVID-19 den raraba mapang teyari tulu agütsüba aser iba atema HNB Campaign mapa tajung asoshi kanga pelar, ta ashi.

Kasa mapang nung Help Nagaland Breathe Campaign-i COVID-19 den rara nung amshitsü atema medical relief aser supplies balala agütsüba Deputy Commissioner Kiphire,

T Wati Aier-i District Task Force Kiphire tenüng nung agizükogo.

Aier-i, DTF aser nüburtem tenüng nung HNB team-i, Kiphire District nem Covid-19 wara den rara nung teyari agütsüba atema mulungso tenla tajung agütsüba atema kanga pelaba lemsatepogo.

Medical supplies temrongnung PPE kits (500 nos), N95 masks (100 nos), 3 ply masks (3,000 nos), pulse oximeters (50 nos), gloves (500 nos), oxygen cylinder regulators (20 nos), thermometers (50 nos), pediatric oximeters (10 nos), oxygen masks (20 nos) aser infrared temp guns (20 nos) densema lir.

Khonsa nung NSCN (IM) züngsem ka bendanga agütsü



Dimapur, Mongputeni/ October 27 (TYO): HQ IGAR (North) tawabangba

kübok Assam Rifles Khonsa Battalion-i telungpurtem bendanga agütsüdaktsütsü

atema tanenmakai inyaka aruba sülen Arunachal Pradesh, Tirap District kübok Khonsa jila nung NSCN (IM) züngsem ka bendanga agütsüogo.

Telungpursang bendanga agütsüba ajanga iba tesem nung aliba tanga telungpurtema bendanga agütsütsü atema ajungmesotsü. Telungpursang yagi telungpur ka ama pa kanga timtem nung aliba lemsatepogo, aser külem züngsemtem dang azütokshiba lenmang toktsütsü atema ayongzükogo.

GPRN aser NSWON-i asükhu lemsatep

Dimapur, Mongputeni/ October 27 (TYO): Government of the People's Republic of Nagalim (GPRN)-i sangdong ka ajanga Mrs. Mary Rayi, Tatar, NSCN/ GPRN October 26 nü asüba osang angazüka mang ayimba lemsatepogo. La Wung Tangkhul Region (WTR) kübok Kachouphung yimtsüng nungi liasü. La Naga nunger tenzüktsü atema 1987 küm March 6 nü züngoksema liasü. Lai masü tashi Naga lima bendanga agüja tenzükogo aser la melener angutsü tasak asütsü. Lai Naga nunger bendanga agüja tenzükba atema la tenüng Naga nunger

puti otsü nung teti atema mangoaka ayutsü aser teti menungra bilmettsü.

NSCN/GPRN-i, Mrs. Mary Rayi'er kinungertem den asükhu lemsateper aser tulusang Tsüngremi mangyim jashi khuret koktetsü atema lar kinungertem nem anisüngzük agüjang ta sarasademtsüba den la tanüla teti tatem makadak anisüngzükdakjang ta sarasademtsür, ta MIP, NSCN/ GPRN sangdong ka ajanga metetdaktsü.

Kasa mapang nung National Socialist Women's Organization of Nagalim (NSWON)-ia, Mrs. Mary Rayi (Tatar) October 26 nü asüba

osang angazüka mang ayimba lemsatepogo. La asüba sülen ano lenir tejen ka samaogo aser lai toktsüba tawa ya süngdaktsütsü atema tasak asütsü. Lai Naga lima atema taküm tenla agüja bendanga inyakba atema teti bilemttsü, ta kasa sangdong ajanga metetdaktsü.

National Socialist Women's Organization of Nagalim-i, asür kinuntertem den asükhu lemsateper aser tulusang Tsüngremi la teti tatem makdak yimjung nung tokjang ta sarasademtsür, ta NSWON Chairperson Hosheli Achumi-i sangdong ka ajanga lemsatep.

KIBONG KÜMER KÜM 50 AJUNGBA TEPELA ANOGO

27th Oct. 1971 - 27th Oct. 2021

Mr. & Mrs. Y.K. Meren Jamir

"Nüna libaliro aser temeimtepji meküta aliba nüburtem ajak asoshi tezüngzüktep yutetpa tatishitsü tajung".

Onok aküm asoshi asen teyanglur Tsüngremi nüna arishi tajung moajangma ta sarasademtsür.



Temeim chirnur, anükapang, Amor aser semchirtem.

--- SANGDONGER ---

Chuchuyimpang Mongoya Prayer Garden nung 29th to 31st Oct 2021, anogo asem Healing Crusade sentong renema lir. Anungji nübur kar danga shi aser tanela nung taneptsü aginüa lira arua Tsüngremer temoatsü agitsü Arogo ajanga lemsateper. Iba sentong mapang sorkar tetuyuba SOP amshitsü.

Tongteprateptsü atema : M- 9856486841 / 8258802047
Mapang - Aonung : 5:00 PM. Anepdang: 9:00 AM.
Nikongdang : 12:00 PM

Urgent Plot for sell 200x100 Sq.ft at Chumokidema -A village, near new DC complex. Rs. 200 per Sq.ft only, price negotiable.
Contact: 8119920479.
Sincere customer only

LOST NOTICE

I, Pangernungba Longkumer, am applying for a duplicate copy of NU registration card No. 17030253 as I have lost it.

Meluri nungozüng alema kiojen yanglur aliba raksatsü



Dimapur, Mongputeni/ October 27 (TYO): ADC subdivision administration-i, Akash apu nungi Akhegwo tashi two-lane lenmang yanglutsü atema asazüker aliba tesemtem nung ozüng alema kiojen yanglur alibatem raksatsüogo.

Administration-i office osang

ka ajanga September 30 nü tashi nungbo ozüng alema kiojentem yanglur aliba agintsü atema tetuyuba agütsüba sülen nüburtemi manidakba ajanga October 26 nü Administration den DEF, IRB, NAP aser VG temi kiojentem raksajaogo. Iba sentong ayongzüka inyakba mapang kiojen 26 raksaja liasü.

ATMA Kohima-i metsüjangnatsü lemtsü



Dimapur, Mongputeni/ October 27 (TYO): ATMA Kohima district-i, October 27 nü DAO Conference hall nung metsüjangnatsü lemtsüba sentong ka ayongzüka agiogo. Iba sentong nung ATMA Kohima district Blocks tenet nung aliba

FIGs, FSGs aser CIGs tem nem Rabi seeds lemja liasü. Metsüjangnatsü tem rongnung broccoli, cauliflower, cabbage, knol khol, radish, turnip, carrot, coriander, aser chinese cabbage nunger amala densema liasü.

NSF Trophy: Berenike FC & Phesama YO na quarter-i iogo



October 27 nü Berenike FC Meriema aser Puliebadze Club na asayaba mapang tangokba noksa nung angur.

Kohima, Mongputeni/October 27 (TYO): October 27 nü 21buba NSF Martyrs' Memorial Trophy nung Berenike Football Club-i taoba mapang iba asayamung koker aliba team Puliebadze Club Jotsoma kokogo.

Iba asaya telok ana tsungda kanga toktepbaba asayaba sülen Berenike FC nungi asayar Sinlo Kent-i goal ka idakja parnoki 2005 kum iba asayamung koker aliba Puliebadze Club madak takok ngua liasü.

Tanü mezüngbuba asaya Phesama Youth Organisation

asayaba Magdaline Coaching FC na asayaa liasü. Iba asaya nung Phesama YO puri tesülen nungi atur asaya goal 4-1 agi koka liasü. Asaya nung Keleze Chuse-i hat-trick idakja liasü.

Asaya nung Magdaline FC nungi asayar Vizapo Phinyo-i minute 19buba nung mezüngbuba goal aser Kevissekho-i minute 36buba nung tanabuba goal idakja parnok goal 2-0 agi tejakdang liasü. Ajisüaka asaya tanabuba shilem nung YO puri tajungba asaya aser parnoki goal pezü idaktsü, kong Keleze Chuse-i

minute 42, 43 aser 50 nung goal asem idaktsüba aser Vikehiezo Mejura-i minute 70buba nung par telok atema goal pezüba idaktsüba densema lir.

Tanü asaya akokba team ana ya November 1 nü mezüngbuba day and night quarter final asaya nung ajuruteptsü.

October 28 nü asaya:

1. Mele FC, Noklak vs Gaziphema FC, Manipur @ 12:30 PM
2. Mhakenyi Kro-u FC vs Morning Football Association @ 2:00 PM

Rahul Dravid-i coach mapa atema pa tenüng agütsüogo

New Delhi, Mongputeni/October 27 (Agencies): Rahul Dravid-i India's senior men's team head coach mapa atema Mongolbarnü pa tenüng benokogo.

Taoba India team captain shiba tang National Cricket Academy (NCA) nung head of cricket lir, pai T20 World Cup tembangba sülen Ravi Shastri ket nungi coach mapa belenzüktsü renema lir. India's developmental sides nung külemi inyakasang Paras Mhambrey-a Bharat Arun melena bowling coach akümtsü renema lir.

TOI-i October 16 nü Dravid-i pa nem BCCI-i maongka agütsüba agizükogogo ta sangdonga liasü. October 15 nü Dubai nung IPL final asayaba aonung tir Sourav Ganguly aser

secretary Jay Shah na den mapang talangka sensak asema sülen Dravid-i iba mapa agizüktsü mulunga aküm. Dravid aser pa indang support staff nem kum ana atema contract agütsütsü. Dravid nem itasen sen crore 10 agütsütsü. Ajisüaka board-i tang tashi R Sridhar melentsü atema fielding coach meshimi lir.

Abhay Sharma, shiba Dravid indang core team nung lir, pai iba mapa abentsü atema jangrar aser kasa mapang nung taoba India team wicketkeeper Ajay Ratra-ia iba mapa atema pa tenüng agütsüogo.

Kasa mapang nung Paras Mhambrey-i Team India bowling coach mapa atema pa tenüng benokogo.

Coach mapa abentsü atema

Dravid mesüzükba sülen BCCI tang NCA nung pa melentsü pur ka bushidar. Board-i Anil Kumble mesera VVS Laxman nem NAC nung iba mapa bendaktsüner.

Team India mapa atema Laxman-i Dravid pusema liasü. Pai ashiba agi, Dravid-i pa nem maongka agütsüba magizükra iba mapa atema paa tokteptsü. Laxman-i team India coach mapa abentsü atema mabo mulunga liasü saka NCA tekolakba mapa yabo mebenü, kechiyong pa Hyderabad toktsür Bengaluru nung oa alitsüsa akümtsü.

Osang ajanga ashiba agi, Kumble dang masüngdang tsüngda Laxman dang tanaben iba mapa abentsü atema asüngdangshitsü.

Arsenal, Chelsea aser Sunderland League Cup quarter tongogogo

Mongputeni/October 27, 2021 (Agencies): Bodhbarnü Arsenal aser Chelsea nati Premier League club Leeds United aser Southampton na koka League Cup quarterfinals-i iogo aser kasa mapang nung third-tier club Sunderland-a quarter-i iogo.

Arsenal-i Leed den asaya goal 2-0 agi koka liasü. Asaya tanabuba shilem nung Calum Chambers aser Eddie Nketiah nati goal kaka idakja parnoki iba asaya akok.

Asaya nung mezüngbuba goal Chambers-i minute 55buba nung idaktsü. Pa substitute ama aiter second 23 tsüngda goal

idakja liasü.

Iba sülen Gunners' pur atema minute 69buba nung Nketiah-i tanabuba goal idakja liasü.

Chelsea aser Saints na Stamford Bridge nung asaya goal 1-1 agütsür tembangba sülen penalty ajanga Chelsea-i asaya akok.

Asaya mezüngbuba shilem atemtsü lia Kai Havertz-i goal ka idaktsüba sülen Thomas Tuchel-i aniba team tejakdang liasü.

Ajisüaka asaya tanabuba shilem tenzüker minute asem tsüngda Che Adams-i Saints atema goal ka idakja goal kasasa aküm.

Takoker jangjatsü atema penalty metsütepba mapang Saints pur atema Theo Walcott aser Will Smallbone nati goal midaktsütetba sülen Reece James-i tatembangbuba goal idakja Chelsea-i goal 4-3 agi asaya akok

League One team Sunderland puria defeating Championship (second-tier) Queens Park Rangers pur penalty ajanga kokogo.

Asaya nung goal kaka danga magütsüteti asaya tembangba sülen penalty metsütepba mapang Sunderland-i goal 3-1 agi koka liasü.

Wushu Championship nung Nagaland-i medal ana angu

Kohima, Mongputeni/October 27 (TYO): 20buba Junior National Wushu Championship nung Nagaland team-i medal ana nguogo. Iba asayamung ya Lovely University Jalandhar, Punjab nung October 20 nungi 25 tashi asayaa liasü.

Nagaland Coach Gabriel Khamo-i sangdong ka ajanga ashiba agi, Nagaland nungi asayar Nagom Konyak-i, dual asaya nung gold medal aser taolu events nung bronze medal ka ngua liasü.

Taruba Senior Wushu National Championship atema November ita tatembangbuba hopta trial selection agitsü. Iba dak sendakba nung instructors ajak aser trial nung shilem agitsü jangrartem ajak renema atatsü atema mepeshia metetdaksüogo. Trial selection dak sendakba nung osang tejangja agitsü atema Gabriel Khamo den November 5 nü mesera iba sülen iba @ Mobile No. 9612433322 ajanga t o n g t e p r a t e p t s ü metetdaksüogo.

NCA-i Nagaland tetsür team sangdongogogo



Dimapur, Mongputeni/October 27 (TYO): Nagaland Cricket Association-i, Senior Women's One Day Trophy 2020-21 atema Nagaland Senior Women's Cricket Team sangdongogogo.

Nagaland team October 28 Manipur den mezüngbuba asaya asayatsü.

Asavartem:

Sentimenla Imsong (Captain), Limatola Jamir, Kekhrienuo Rupreo, Jyoti Thapa, Elina Muru, Ritu Karmakar, Lydia T Murru, Talirenla Pongen, Merensola, Kikayangla, Rwisumwi Basumatari, Lovikali, Alamlie, Khrukhsalu Dawhuo, Zhovelu Chuzho, Helen Zaputou, Poonam Nana

Saheb Khemnar (guest player), Kiran Prabhu Navgire (guest player), Gautami Jitendra Naik (guest player).

Support staff:

Ato Chang (team manager) Cheluvaraj (team coach) Sujit Rane (team S&C coach) Wangshila Jamir (team physio)

Asayatem:

28-10-2021: Nagaland vs Manipur
31-10-2021: Nagaland vs J & K
01-11-2021: Nagaland vs Sikkim
03-11-2021: Nagaland vs Meghalaya
04-11-2021: Nagaland vs Arunachal Pradesh
06-11-2021: Nagaland vs Bihar
Asayatem ajak Kolkata nung asayatsü.

Mushtaq Ali Trophy atema Mumbai asayar 4 dak Covid potet

Mongputeni/October 27, 2021 (Agencies): Syed Mushtaq Ali Trophy atema Mumbai team nungi asayar pezü dak COVID-9 tashidak potetogogo aser parnok melenertema shimogo.

"Senior team nungi asayar pezü dak covid tashidak potetogogo. Tashidak menar alirtem ya Shams Mulani, Sairaj Patil, Prashant Solanki aser Sarfaraz Khan nung lir," ta source kati PTI dang ashi.

Kasa mapang nung Mumbai Cricket Association (MCA)-i COVID-19 tashidak menar aliba asayar pezü ya melenogogo aser parnok

melenertem tenüng ya mapang tatsüka tsüngda sangdongtsü.

"Onoki Rapid RT-PCR (temelenertem) agidar aser osang yakta arutsü aser iba dak ajemdaker parnok team nung adentsü. Maneni onoki squad nung tanga züngsemtem daka RT-PCR test agidar," ta kasa source ajanga metetdaksü.

Mumbai team ya Elite Group B nung asayatsü. Parnok November 4 nü nungi tenzüka domestic T20 tournament league asayatem Guwahati nung asayatsü. Parnok Karnataka den asayaa iba asayamung tenzüksü.

BILEMDANGANG

"Merangdang makokba atema kecha maksü mali."